

Fobitro Injil Shorif 26 nombor sifara al-Ehuda Forisiti

Alla Pakor hukume Hozrot Isa al-Mosir haton bai Hozrot Iakubor (ra:) afon bai Ehudae (ra:) ou sohifağan leksoin. Hozrot Isa al-Mosie dunia taki behesto toshrif neoar onuman 40-50 bosor bade ou sifara leğa oise.

Bonđo zeta ustad okole nizore imandar koia dabi korto, tarar befare hushiar oar lagi ou sifarat talim ase. Itar hesh dosha kita oibo, oğan zanail oise. Ar agor zomanar kunu kunu naforman manush, lannoti firista ar tarar qoumor udahoron deoa oise.

Leğoke Isaei ummot okolre koira, Allae tumrare ze iman dan qorsoin, ou imanor lagi dilezane larai qorat ro.

Ermaze ase,

- (1) Salam ar dua 1:1-2 *aeat*
- (2) Bonđo ustador birudde imani larai salao 1:3-16
- (3) Imane basia ro 1:17-23
- (4) Bidaei dua 1:24-25

¹ Ami Ehuda to sahabi Iakubor bai ar Hozrot Isa al-Mosir gulam. Amrar gaibi baf Alla Pake zerare mohobbot qoroin, zera Allai daot faisoin, ar Isa al-Mosie zerar hefazot qoroin, ou sohifağan ami erar gese leqram. ² Tumrar ufre besh qori meherbani, shanti ar mohobbot zari rouk.

Bonđo ustador birudde imani larai salao

³ O maear dust oqol, amra hoqole mili ze nazator bagi oisi, ou nazator befare ami kub kiali oia tumrar gese lektam saisi. Ermaze buzlam, aro dorqar ase imanor lagi larair befare lekia tumrare utshaho deoa. Allae tan pak bonda oqolre siroqalor lagi ze imani don disoin, ou Isaei imanor fokke dile-zane larai qora to zorur. ⁴ Itar zorur oise, qaron zeta manshe be-dini qamor shaza faibar qota ag takiu leqa asil, tole tole ota manush aia tumrar dolo hamai gese. Amrar Allar rohomotre tarar bod qaish miqanir atiar banaise, ar amrar eqmatro malik Isa al-Mosir ulqa sole.

⁵ Te ou befar to tumra kub bala qoriu zano, ta-o ami qali oqan mono qorai diram, Mishor desh taki Boni Israilre azad qoria anar bade, tarar mazor zetae iman anchil na, malike tarare binash qorsla. ⁶ Ar zeta firista oqole nizor dae-daeitto adae na qoria, nizor ashon taki hori gesla, Allae tarare siroqal dori shikoldi bandia goin andair goro raqsoin hashoror dinor lagi. ⁷ Ou laqan Hozrot Lut nobir zomanar Sadum, Amura ar qanda-qasar hoqol qaunor manshe otar laqan zina qorsil, qali zina nae, tara kub qobisi zina qorae siroqal dori duzoqo zolbo, ita oilo eqqa nishana.

⁸ Erbadeo ou bonqo ustad oqol, zetae baze kuab deki deki talim dein, tara qobisi qam qoroin, kunuzat shashon manoin na, ar batuni shordar oqolor bodnam gain. ⁹ Emonki asmanor shordar firista Mikaille zebila Hozrot Musar lash loa Iblisor loge torqa-torki qorsla, ou shomoe tain Iblis-shoetanor bodnam gaia dushi shai-bosto qorar shaosh qorla na, borong qoila,

“Malike zanu tumare bond qoroin.” ¹⁰ Oile ou bono ustad okole zeta buze na otar bodnam gae, ar zongli zanuaror laqan nizor akole nizor shorbonash goxae. ¹¹ Ita to lannoti! Iguin Baba Adomor lannoti fut Kabilor laqan bonchoin. Duniabi labor ashae tara hou bono nobi Balamor qaishor ato nizore shofi dise. Ar Musa nobir bae bigri zaora hou neta Kurahor laqan tarar binash ase.

¹² Te ou lannoti ota aia zebila be-shoromor laqan tumrar mezbani kae, ou shomoe ita oizain tumrar qanir talor moela. Tara qali nizor shartor danda qore. Tara oila, asmano urra huda megor saqa, ba bagano duibar mora-hukna fol gas, zegie fol na dorae, zoqe-foqe huria tulia falail oise. ¹³ Ar tara oila tufanor qalor doriar qeur laqan, doriar qeue zela fenare bashaia tule, tarar bod qamor shoromo ola bashia uqe. Tara oila, sairobae sokkor deora terar laqan, itar hesh dosha oilo hor-hameshakur lagi zoma raqa goin andair.

¹⁴ Baba Adomor qandanor shat nombor zon Hozrot Idriseo ota manshor befare qoia gesoin, “Huno, manshor bisar qorar lagi, Malik-Moulae tan azar azar fobitro firista loia aira. ¹⁵ Zetae be-dini qam qorsoin ar tan birudde lannoti mat matisoin, okon ou be-din gunagar okolor faona hishabe tain itare furafur dushi shaibosto qorat aira.” ¹⁶ Itae to hameshau na-sobori qoroin, nizor qofalre dushoin ar tarar bod qaishor boshe soloin. Tarar hoqol mato nizor borai-betagiri deqain, sharto hasilor lagi manshor bozona qoroin.

Imane basia ro

17 Oile O maear dust oqol, ami tumrare qoiram, amrar malik Isa al-Mosir sahabi oqole age zeta bataisoin, ita mono rakio. 18 Era tumrare ou hushiari dita na ni, "Aqeri zomanat forezgarre taqta-moshkora qorra eqzat manush aiba, aia tarar be-dini bod qaish mafik solba." 19 Duniabi babor ita manshe qali doladoli lagain, tarar bitre Allai Pak Ruh nai.

20 Ta-o maear baiain, tumrar ou nikut fakfobitro imanor ufre bor qoria nizore goqia tulat ro, ar Pak Ruhe kamil oia munazat qorat ro.

21 Allar mohobbotor maze nizore bandia raqo, ar aqeri zindegi faibar ashae amrar malik Isa al-Mosir meherbanir lagi bar sao. 22 Tumrar maze zerar imane loqa-soqa qore, tarare doya qoro.

23 Aguin taki tulia ania manshor zan basao. Ar gunar bod qaishor zalae zetar zindegi borbad oigese, itar finnor nafak kafoq qanreo ginna qoro, ar nizore hefazote rakia tarare doya qoro.

Bidaei dua

24 Ar ze Allae tumrare usqa qaoa taki basain, zein nikut halote tumrare kushi-bashie tan shan-tozollir samne azir qorta faroin, 25 hou eqmatro Alla zein amrar zan basain, tan zalal-shan, mohima, kudroti bol-shokti ar raz-qemota amrar malik Isa al-Mosir usillae zair ouk, hokkol zugor ag taki oqon forzonto ar zuge zuge hor-hameshau ola ouk. Amin.

Sylheti New Testament (Latin)
Sylheti: Sylheti New Testament (Latin) New
Testament+

copyright © 2014 Ahle Kitab Society

Language: (Sylheti)

Contributor: The Seed Company

All rights reserved.

2020-11-30

PDF generated using Haiola and XeLaTeX on 22 Feb 2024 from source
files dated 29 Jan 2022
2eb27397-6d35-5c13-b811-aecd7920507c